

1 Pegodo

cadota ante nänö tänota yewæmongainta

Waa quëwencæminimpa, ante

1 ¹ Botö Pegodobo Itota Codito nänö nê da godongaïmo inömo inte nê yewæmömo ïmopa. Minitö ïñömö tömëmini ömæ quëwënamai ïmini inte nâwæ godinque wadani nëmæ ponte quëwëmini inte pancamïniya Pontobæ quëwëñömini wamini guiquënë Gadatiabæ quëwëminipa. Wamini Capadotiabæ quëwëñömini wamini guiquënë Atiabæ quëwëminipa. Wamini guiquënë Bitiniabæ quëwëminipa. Mänömai wayömö wayömö quëwëmini ïñöminite botö, Acæminimpa, ante yewæmömopa. ² Mæmpo Wængongui ïñömö minitö iminite wëñëñedë pöni do adinque, Minitö Itota Codito ingante nê ëñente cæmini bacæminimpa, ante apænte ængacäimpa. Ayæ, Botö ayömo minitö tæiyæ waëmö ëwocamini bacæminimpa, ante cædinque Wængongui Önowoca incæ Itota wepæ inte pönö ñä mënongacäimpa. Mänömai cæcä bagaimini ïñöminite botö ñowo ïñömö edæ, Wængongui nanguï waadete pönö cæcä ate minitö nê gänë pönëmini bacæminimpa, ante yewæmömopa.

**Watapæ bacäimpa, ante
pönëninque quëwëmompä, ante**

³ Itota Codito Wæmpocä ïñongante Itota incæ, Botö Wængonguimi inömi ïmipa, ante Wængongui ingante waa apænecampa. Adocä ïñömö mönö Awënë Itota Codito wænte öñöñongante, Nani ömæmöe, angä ñäni ömæmongacäimpa. Tömengä ñäni ömæmongä beyænque Wængongui

mönö imonte adobai pönö cæcä ate mönö mempoga ëñate bai ïñömö inte edæ, Mönö miïmö quëwëninque watapæ quëwengäëimpa, ante pönente quëwëmompä. ïninque mönö ïñömö Wængongui ingante apænedinque, Bitö tæi ëmönömi inte waa pöni cæbi æmönipa, ante edæ watapæ apænecäimpa. ⁴ Ayæ Wængongui, ïncayæ ate mini ænguincö, ante öönædë do edæ cö cæte mangampa. Mänincoo ïñömö ñömäadamaï incoo ïninque cöwë wentamö badämai incoo inte edæ wodämai inguincö ingäëimpa. ⁵ ïnguipo pedænguipo ïinque bayedë edæ Wængongui pönö ængä beyænque mönö cöwë quëwenguinö ante edonque pöni acäëimpa. ïninque minitö wede pönëmini beyænque minitö quëwenguimämo ïinque baquinganca Wængongui nê tæi piñænongä inte edæ minitö iminite wæ gompocampa.

⁶ Minitö ñowo wantæ ïñö incæ quiëmë beyænque wënæ wënæ bate wæmini incæte Wængongui pönö wæ gompocä beyænque edæ watapæ tomïni iminipa. ⁷ Oodo waëmö bamongäëimpa, ante woadani gongapamö godö aca podönäni ate oodoque badinque waëmonca pöni ongoncäpa. Incæte oodo ïñömö ïncayæ ate ömæe ëwente ate edæ dæ bacäëimpa. Oodo mini æinënönca waëmonca i ïñonte mini wede pönënö ïñömö edæ godömenque waëmö pöni impä. ïninque mini wede pönënö ïñömö wiï wido cæqui impä. Cöwë edæ ongongäëimpa. Wæætë, Mini wentamö entawëninö edæ dæ go ate mini wede pönënonque edæ waëmö pöni entawencæminimpa, ante

cædinque Wængonguī pönō angā ate mīnītō gonga gonte caate bai wæmīnīpa. Mānōmaī mīnī caate wædō beyænque edæ godōmenque wede pönēmīnī bamīnīpa. Īnīnque Itota Codito mōnō weca ponte a ongōñongante mīnītō cōwē wede pönēmīnī inte tōmengā ōnōwa gāānē ædæ wæænte apænedīnque, Nē tæī ēmōnōmī inte bitō waa pōnī cæbi æmōnīpa, ante watapæ apænecæmīnīpa, ante Wængonguī cæcampa.

⁸Itota Codito ingante mīnītō awīnca adāmaī ĩnīmīnī incæte tōmengā ingante cōwē waadete pönēmīnīpa. Edæ ñōwo ganca adāmaī ĩnīmīnī inte mīnītō tōmengā ingante wede pönēnīnque mīnī ñāō bai entawengūnque watapæ todīnque æbāmē ante tomīnī ĩmīnīpa. ⁹Ōnōwoca mīnī ēwocate quēwengūīnō ante æncæte ante wede pönēmīnī inte mīnītō ñōwo ĩñōmō edæ do æmīnī ĩmīnīpa.

¹⁰Wængonguī beyæ nē apænegaīnānī ĩñōmō, Īncayæ ate quēwengūīnānī ĩnānīte Wængonguī pönō cæcā beyænque quēwencædānīpa, ante ñōwomīnī ĩmīnītēdō ante apænecadānīpa. Mānōmaīnō ante apænecadānī incæte tōmēnānī, Ædānīdō ĩnānīte ante Wængonguī apænecāā, ante ēñēnāmaī inte ēñencæte ante nanguī cægadānīpa. ¹¹Codito Ōnōwoca tōmēnānī ōnōwoca quēwēnīnque pönō apænecadīnque, Īncayæ ate Codito nanguī caate wæcæcāīpa, angacāīpa. Ayæ, Caate wædingā inte tōmengā wæætē ñāō bai entawengā inte tæī ēmongā edæ bacæcāīpa, ante pönō apænecā ēñēnīnque tōmēnānī wæætē adodō ante apænecadānīpa. Incæte tōmēnānī, Æyedēnō Codito mānōmaī cæquīngāā, ante ēñencæte ante wægadānīpa. Æbānō ba ate mānōmaī cæquīngāā, ante ēñencæte ante edæ nanguī cægadānīpa.

¹²Ñōwo ĩñōmō Wængonguī oōnædē quēwēnīnque tōmengā Tæiyæ Waēmō Ōnōwoca ingante mōnītonga da pōnongā pōnīnque apænecā ēñēnīnque mōnītō

wæætē Codito ingantedō ante mīnītō ĩmīnīte watapæ apænemōnī ēñēmīnītapa. Mānīne adode ante Wængonguī beyæ nē apænegaīnānī ĩñōmō, Codito waa cæcæcāīpa, ante apænecadānīpa. Incæte Wængonguī tōmēnānī ĩnānīte apænecadīnque, Wīī tōmēmīnī beyæ ante apænemīnīpa, angacāīpa. Īncayæ ate quēwēnānī beyæ ante apænemīnīpa, ante tōmēnānī ĩnānīte angacāīpa. Mānīnō ante Wængonguī beyæ ante æbānō apænecadānī, ante ēñēnāmaī ĩnānī inte Wængonguī anquedoidī incæ, Wadānī beyæ Wængonguī æbāmē waa pōnī cæcāā, ante ēñēnīte wædānīpa.

Wængonguī, Tæiyæ waēmō ēwocædānī, angampa

¹³Mānōmaī beyæ mīnītō, Mōnō nanguī cæcāīpa, ante edæ tāno pōnente ate cæedānī. Nāmā wææ gompotawente bai ēñente cæedānī. Itota Codito ponte a ongōñinque mōnō ĩmōnte waadete pönō cæcā ate watapæ bacæīpa, ante edæ mānīnonque ante cōwē pōnente cæedānī. ¹⁴Wēñānānī wæmpoidī ĩnānīte nānī ēñente cæbai edæ mīnītō adobāī ēñente cæedānī. Mīnītō ēñēnāmaī ĩñedē mīnī cæīnēwēnō ante do cægāmīnīpa. Ñōwo ĩñōmō nē ēñēmīnī badīnque mīnī ēñēnāmaī ĩñedē mīnī cæīnēwēnō ante edæ cædāmaī ĩedānī. ¹⁵Mīnītō ĩmīnīte nē apænte aa pegaīngā ĩñōmō edæ tæiyæ waēmō ēwocadongā ingampa cæmīnī. Quīēmē cædinque edæ tōmengā bai adobāī tæiyæ waēmō ēwocadīnque edæ tōmāā cæedānī. ¹⁶Wængonguī incæ, “Botō tæiyæ waēmō ēwocabo ĩmopa cæmīnī. Botō ēwocabo bai mīnītō adobāī edæ tæiyæ waēmō ēwocacæmīnīpa,” angampa, ante yewæmongatīpa.

¹⁷Tōmāmō ĩmōnte adoyōmō pōnī cædinque mōnō Mæmpo ĩñōmō mōnō cædinō ante cōwā adīnque nōīngā pōnī ante apænte angampa. Īnīnque, Botō Wæmpo, ante nē apænemīnī ĩnōmīnī inte mīnītō ĩñōmō edæ nē nōīngā ante apænte angā ingante edæ guīñente wædīnque quēwēedānī.

Inguipoga quëwëninque mīnitō,
Wabæca baī ongonte awædō, äninque,
Wængonguī weca edæ mōnō ömæ
ingæïmpa, ante pōnente quëwëedäni.
¹⁸Edæ, Dodäni näni quëwengäi baī
adobaī quëwengæïmpa, ante änäni
ëñëninque mīnitō Ao ante önonque
pōni cæte quëwengamīnīmpa.
Mänömaī quëwëñmōinite Codito
wæætë, Mīnitō abæ tawænte baī
quëwencæmīnīmpa, ante cædinque
edæ, Quinō godongantawo, ante mīnitō
do ëñëmīnīpa. Ìñæmpa oodo incæ
padata incæ mōnō, Woquincoo, ancoo
iñonte tömengä dicæ mänincooque
godongantawogaa.

¹⁹Wæætë quiipi wë, Codotedo, näni
änongä iñömō quenta mongænāmaī
wentamō ëñadāmaī imaī Codito
adobaī inongä inte edæ tömengä nämä
wepæ täiyæ waëmō wepæ godonte
ængä beyænque quëwëmīnīpa.

²⁰Inguipoga badoncæte ante cædinque
Wængonguī ayæ gö cædāmaī ingäñedë
wëñëñedë pōni incæ Codito ingante
edæ, Mänömaī cæcæbiīmpa, ante do
apænte ængacäïmpa. Codito mīnitō
beyæ ante edæ ñöwo pōni incæ
inguipoga pōninque ongongantapa.

²¹Inguipoga pōninque tömengä do
wænte öñöñongante Wængonguī, Nāni
ömæmōe, angä näni ömæmongacäïmpa.
Ayæ tömengä ingante godömenque
godō ææntodongä ate tömengä ñäö
entawënongä inte tömengä nänō täi
ëmonguinque edæ æite gogacäïmpa.
Wængonguī mänömaī në cægäingä
iñongante Codito mīnitō imīnite
pōnō cæcä beyænque mīnitō wæætë
Wængonguī ingante pōnëmīnitapa.
Mänömaī beyæ mīnitō, Wængonguī
pōnō cæcä beyænque watapæ bacæïmpa,
ante pōnëninque tömengä ingante wede
pōnëmīni bamīnitapa.

²²Wængonguī nō nänō änō ante
ëñente cædinque mīnitō mīmō ñä
mënogate baī badinque mīnitō
tönñadäni inänite në waadete pōnëmīni
bagamīnīmpa. Nöwo iñömō mīmōno nō
pōnëninque mīnitō godongämæ ædæmō

waadete pōnëninque wacä ingä wacä
ingä godō waa cæedäni. ²³Edæ waomō
mōnō yate pōniwoca wæwocaquī
iñonte wiī mäninō beyænque mempoga
ëñagamīnīpa. Wæætë Wængonguī
nänō änönō mīi quëwenguīnō
iñömō edæ wodāmaī inte cōwë
ongongæïmpa. Mäninō Wængonguī
nänō änönō beyænque mīnitō mempoga
ëñagamīnīpa. ²⁴Edæ,

“Waomō gaguimænque baī iñömōnte
gaguimæ do to aminca baī mōnō
adobaī aquīi pōni iñömō inte
wæwocamōmpa.

Waëmō pōni mōnō ëmönō iñömō
edæ ongai waëmō ængado baī
iñonte

ongai edæ do guiñë wæno baī mōnō
ëmönō adobaī bacæïmpa.

²⁵Incæte Wængonguī nänō änō
iñömō edæ cōwë wodāmaī
ongongæïmpa.”

Ante edæ ämotamīni ante baī
Wængonguī beyæ näni yewæmongainō
baī impa. Mäninō Wængonguī nänō
änönō ante mīnitō imīnite do watapæ
apænemōni ëñëmīnitapa.

2 ¹Mäninō beyæ mīnitō piinte mīni
pönëwënō edæ ñimpo cæedäni.
Wacä adāmaī iñongante babæ mīni
cædō ante edæ cædāmaī ñimpo cæedäni.
Mīnitō wadō apænete wadō mīni cædō
ante ñimpo cæedäni. Mänömaī cæte
mīni quëwëninō ante edæ æmæwo
ñimpo cæedäni. Wacä gomonga ængä
ingante godō piinte adāmaī iedäni. Wacä
ingantedō ante babæ ante mīni piinte
änewënō ante edæ ñimpo cæedäni.

²Wëñænäni tæcæ ëñadīnāni inte goömæ
gäinente wædäni baī mīnitō adobaī
Wængonguī nänō apænedonque ante
ëñencæte ante wæedäni. Edæ tömengä
ængä beyænque mīnitō në quëwëmīni
inte mīnitō öñöwoca ædæmō picæmīni
mīni pæquinque edæ tömengä nänō
apænedō ante edæ goömæ waëmömæ
beinente baī ëñencæte ante wæedäni.

³Waëmepæ impa, ante adinque
wëñængä goömæ wæætë wæætë becä
baī mīnitō adobaī, Mönō Awënë waingä

pōni ingampa, ante do adīmīni inte
tōmengā weca wæætē wæætē ponte bete
bai edæ ēñēedāni.

**Nē quēwengā inongā inte Codito
wainca bai ingampa, ante**

⁴Oncō dicaca mænoncæte ante
cædinque waodāni, Wīwa inca awædō,
ante pancacaa wido cædāni bai waodāni
pancadāniya mōnō Awēnē ingante
adobaī wido cædānīpa. Wængonguī
guiquēnē mōnō Awēnē nē quēwengā
ingante waa adinque, Botō owocō
mænonguinca wainca pōni bai tōmengā
ingampa, ante tōmengā ingante apænte
æninque ee mangampa. Īninque mīnitō
īñōmō tōmengā weca pōñōmīnite
tōmengā, ⁵Mīnitō mīimīni quēwēñōmīni
Wængonguī mīnitō imīnite ænte
cabo tingæte adoconque mænonte
bai cædinque edæ, Botō Ōnōwoca
owoquincō, ante badongā quēwēmīnīpa.
Quēwēñōmīnite godōmenque tæiyæ
waēmō badongā badīmīni inte edæ
mīnitō īñōmō edæ Wængonguī Ōnōwoca
tōnō āawocaque bai ēwocādīnque,
Wængonguī quī, ante nē godōmīni
bamīnīpa. Īninque mīnitō Itota Codito
ēmōwo ante apænedīnque, Wængonguī
quī, ante godōmīni ate tōmengā edæ
waa ængampa. ⁶Edæ Wængonguī
apæncā ēñēinque īmaī ante do
yewæmongadānīpa.

“Tiōnoquidi dæguimonga
mænoncæte ante cædinque dica
tānoca gō cæte bai cædinque,
Botō nē waa adongā ingante ænte
pōnō Tānocā pōni gōnōmo
gongæncæcāimpa.

Tōmengā ingante nē wede pōnengā
ingante wadāni ædō cæte
bæ taquīnāni guingo imonte
wæquīngāā,” angacāimpa.

⁷Mīni pōnencabo īñōmō, Tānocā nē
ongongā īñōmō waingā pōni ingampa,
ante adinque tōmengā ingante æninque
ee māmīnīpa. Wīī pōnēnāni guiquēnē
tōmengā ingante Baa ānānīpa.

“Nē mænōnāni nāni wido cædinca
inca

ñænænca pōni gōnōnīnca bate
tānoca inte tæī gongæncapa,”
ante Wængonguī beyæ nāni
yewæmongainō bai cædānīpa. ⁸Ayæ
adobaī,

“Dīcaa nē tao tencawa tæ go
wæængā bai ināni inte
tōmēnāni nē Tānocā ingante pīinte
adinque tæ go wæænte bai oda
cædānīpa.”

Ante yewæmongatīmpa. Tōmengā nānō
angainō ante ēñēnāmaī nāni cædō beyæ
oda cædinque tæ edæ go wæænānīpa.
Tōmēnāni edæ mānīnonque cædinque
nē tæ go wæænguēnēnāni cōwē
ingadānīpa.

⁹Wængonguī nānō nē apænte
ængaimīni guiquēnē wēmō īñōmō
quēwēñōmīnite tōmengā aa pedīnque,
Botō weca botō waēmō pōni ñāō
ēmōñōmō pōedāni, ante cægacāimpa.
Mānōmainō cægāingā īñongante mīnitō,
Bitō Wængonguī Waēmō pōni ēmōnōmi
inte waa pōni cæbi edæ æmōnīpa, ante
anguēnēmīni imīnīpa. Mānōmainō ante
watapæ ancāmīnīmpa, ante cædinque
tōmengā mīnitō imīnite do apænte
ængacāimpa. Īninque mīnitō Awēnē
wēmīni inōmīni inte, Wængonguī
quī, ante mīnicabo nē godōmīni bai
bamīnīpa. Wængonguī, Botō quīmīni
imīnīpa, āninque tæiyæ waēmō badongā
bagaimīni inte mīnitō Wængonguī
nempo nē quēwēmīni imīnīpa.

¹⁰Mīnitō wēēnēñedē adocabomīni
ināmaī ingāmīnīmpa. Nōwo guiquēnē
Wængonguī tōnō godongāmæ
quēwēmīni inte edæ adocabomīni
imīnīpa. Wēēnēñedē guiquēnē
tōmengā mīnitō imīnite pōnō waadete
cædāmaī ingacāimpa. Nōwo guiquēnē
tōmengā pōnō waadete waa cæcā ate
quēwēmīnīpa.

**Wængonguī ingante nē cæmō
imompa, ante quēwēedāni**

¹¹Botō nē waademīni edæ ēñēedāni.
Mīnitō inguipoga quēwēmīni incæte
inguipo wīī tōmēmīni omæ bai impa.
Wæætē wabæca quēwente bai quēwēmīni

inte mīnitō ōnōwoca wentamō
 mongænāmaī ingæīmpa, ante edæ wææ
 cædinque mīnitō baonque ante mīni
 cæinewēnō ante ñimpo cædinque edæ
 cædāmaī iedāni āmopa. ¹²Nē ēñēnāmaī
 ināni weca quēwēninque mīnitō wæætē
 waa cæte quēwēedāni. Tōmēnāni
 guiquēnē mīnitō imīnite pīīnque,
 Wēnæ wēnæ cæminīpa, ante babæ
 ānānitawo. Incæte mīnitō waa cæmīni
 īnīnque tōmēnāni, Waa cæcampa, ante
 do abainānīpa. Īnīnque Wængonguī
 Awēnē nānō apænte āñedē tōmēnāni do
 againāni inte Wængonguī ingante, Bitō
 ñāō bai ēmōmi inte cæbi ate bitō wēnāni
 waa cædāni amōnīpa, āmaīnānīpa.
 Īnīnque tōmēnāni waa adīnque waa
 apænecædānīmpa, ante cædinque mīnitō
 ñōwo incæ waa cæte quēwēedāni.

¹³Waadāni inānite wadāni edæ,
 Awēnēidi inānīpa, ante godō gōnōnāni
 ongōnānīpa. Æcāmē ingante ānāni
 bayōnānite mīnitō wæætē Wængonguī
 Awēnē beyænque ante cædinque
 tōmēnāni inānite edæ ēñente Ao ante
 cæedāni. Adocanque ingante, Awēnē
 Odeye, ānīnque godō gōnōnāni ate
 mīnitō īñōmō, Tōmengā tæiyæ awēnē
 inte nē angā īnongā ingampa, ante
 adīnque tōmengā ingante ēñente
 cæedāni. ¹⁴Ayæ pancabaa awēnēidi
 gobedōnadodoidi mīni ānōnāni inānite
 godō gōnōnīnque awēnē odeye wæætē
 īīmaī angampa. Mīnitō wēnæ wēnæ
 cædāni inānite edæ godō pædāni. Ayæ
 waa cædāni adīnque mīnitō, Waa cæmīni
 imīnīpa, ānīnque edæ godō waa cæedāni,
 ante gobedōnadodoidi inānite godō
 gōnongā ongōnānīpa cæmīnīi. Mīnitō
 tōmēnāni inānite adobai ēñente cæedāni.
¹⁵Ēñēnāmaī ināni wīwa tedeyōnānite
 mīnitō waa cæmīni ate wædinque
 tōmēnāni ædō cæte godōmenque wīwa
 tedequīnānīi. Īnīnque, Tōmēnāni pæ
 wēēnedīnque tededāmaī incædānīmpa,
 ante cædinque mīnitō īñōmō edæ waa
 cæte quēwēedāni, ante edæ Wængonguī
 angampa cæmīnīi.

¹⁶Tōmengā ñimpo cæcā quēwēmīni
 inte mīnitō, Wacā wææ ānāmaī

īñongante botō æbānō cæte waa
 quēwenguīmoo, ante adīnque nāmā
 wææ ante cæedāni. Incæte mīnitō wacā
 wææ ānāmaī ingā beyænque awēmō
 wēnæ wēnæ cæmīnitawo. Edæ cædāmaī
 iedāni. Wæætē Wængonguī ñimpo
 cæcā quēwēmīni inte mīnitō tōmengā
 ingante nē cæmīni inte edæ ēñente
 cæte quēwēedāni. ¹⁷Tōmānāni inānite
 mīnitō, Waodāni inānīpa, ante edæ
 waa aedāni. Mīni pōnencabo īñōmīnite
 edæ godongāmæ waadete pōnēedāni.
 Wængonguī ingante, Wængonguī
 ingampa, ante guīñente wæedāni.
 Awēnē odeye ingante, Tæiyæ awēnē
 ingampa, ante edæ waa aedāni.

**Codito æbānō caate wægacāi,
 ante pōnēedāni, ante**

¹⁸Pancamīniya imīnite wadāni ō
 ænāni wædimīni inte mīnitō tōmēnāni
 beyænque cæmīni bamīnīpa. Īnīnque nē
 ō ænāni īñōmō pōnō waa cædāni incæ
 pōnō pīinte cædāni incæ mīnitō wæætē,
 Botō awēnē ingampa, ante piyænē
 cædinque tōmēnāni nāni anganque edæ
 ēñente cæedāni. ¹⁹Edæ waocā wēnæ
 wēnæ cædāmaī īnongā inte quīēmē
 beyænque wæwente caate wæcā incæte
 tōmengā, Wængonguī acampa, ante
 pōnēnīnque nangæ batawēnāmaī ingā
 īnīnque edæ waa imāimpa.

²⁰Wæætē mīnitō wēnæ wēnæ
 cæmīni beyæ pānāni ate mīnitō
 piyænē cæmīni īnīnque Wængonguī
 mānīnō beyænque dicæ waa aquingāa.
 Waa adāmaī imāingampa. Wæætē
 waa cæmīni beyænque pānāni caate
 wædinque mīnitō piyænē cæte ee
 cæmīni adīnque Wængonguī edæ, Waa
 cæbīpa, āmaīngampa. ²¹Botō caate
 wædōnō adodō taadō tee empote
 pōedāni, ānīnque mīnitō beyæ Codito
 caate wægacāimpa cæmīnīi. Botō
 caate cægongainō adodonque
 cægonte wæcæmīnīmpa, ante mīnitō
 imīnite do aa pecā pongamīnīmpa.
²²Tōmengā īñōmō edæ cōwē wēnæ
 wēnæ cædāmaī ingacāimpa. Ayæ cōwā
 ayōnāni tōmengā dicæ babæ ante cæcā

agadāniyaa. ²³Tömengä ingante piinte badete toyönāni tömengä wæatedö wæætē piināmai ingacāimpa. Caate wædinque tömengä wæætē piinte ānāmai ingacāimpa. Wæætē, Nē nō apænte ānongä Wængongui incæ botö beyæ cæcæcāimpa, ante pönëninque piyænē edæ cægacāimpa. ²⁴Minitö wënæ wënæ mini cægaincoo ante Baa āninque mongænāmai inte nō pōnī cæte quëwencæminimpa, ante cædinque tömengä nāmā baonga teēmē mongæñongante tömengä ingante awāa timpodāni edæ wængacāimpa. Īninque tömengä mongænte nānō wængainō beyæ mönō wæætē mäninō wënæ wënæ mönō cægainō ante wænte bai ĩnömō inte nō pōnī cæcæte ante quëwēmō inguënēmō ĩmompā. Tömengä ingante tæi pānāni nānō āmogate wægāinō beyænque mīnitö wæætē gancæ bamīnīpa. ²⁵Edæ obegaidi pāmænte godāni bai ingāimīni inte mīnitö ñōwo nē aacā weca adodö ocæ ēmænte pōmīni adinque tömengä ĩñömō edæ mīnitö önōwoca beyæ ante wææ aacā ēwocāmīnīpa.

**Mīna gāncaya ĩmai
quëwencæmināimpa, ante**

3 ¹Onquiyæmīni ēñēedāni. Mīnitö nānōogænāni nāni ānonque ante Ao ante ēñente cæedāni. Mīni nānōogænāni pancadāniya Wængongui nānō ānō ante pönënamāi ĩnānitawo. Mānōmai ĩ ĩnīnque mīnitö ĩñömō, Wīi mōnitö tededö beyæ pōnāni inte tömënāni wæætē ēñente mōni cædinō ante adinque Wængongui gāmænō poncædānīmpā, ante cædinque piyænē cæte edæ tömënāni ĩnānite ēñente cæedāni. ²Mīnitö Wængongui ingante guñente wædinque waëmō entawēmīni inte ēñente cæte waa quëwēmīni adinque tömënāni wæætē Wængongui ingante Ao ante pōmainānīpa. ³Mīnitö, Waëmō pōnī bacæboīmpā, ante cædinque ocagui waa pōnī wao wincate oodo mongænte wamoncoo mongænte weocoo waëmoncoo wëñate mongæmīnitawo. ĩñæmpā mānōmai

cæmīni beyænque mīnitö dicæ waimīni bamīniyaa. ⁴Wæætē tömëmīni waa entawënō beyænque waimīni pōnī baquënēmīni ĩmīnīpa. Mīnitö önōwoca gānē pönëninque ædæmō cæmīni beyæ mīni waa entawënō edæ wodāmai inte godōmenque waëmō pōnī ongongæīmpā. Mānīnō mīni waëmō entawënō bai ante æncæte ante edæ quïēmē ĩmpā diyæ godonte ænguīi. Incæte Wængongui mānīnō ante adinque, Waëmō pōnī entawēmi abopa, ante nanguī tocampa.

⁵Dodāni pōnī mönō wængānāidi ĩñömō, Wængongui pōnō cæcā beyænque waa bacæīmpā, ante wede pönëninque tæiyæ waëmō entawengadānīmpā. Tömënāni waëmō pōnī bacæte ante tömënāni önōwoca gānē pönëninque ædæmō waadete cægadānīmpā. Tömënāni nānōogæidi nāni ānonque ante ēñëninque Ao ante cægadānīmpā. ⁶Dodā ñæñænā Tada wodi ĩñömō Abadāo wodi ingante ēñente cædinque tömengä ingante, Nē āmi ĩmīpa, angacāīmpā. Mīnitö ĩñömō tömënā nānā cægai bai waa cædinque mīni guñente wæpāmo æbāmē ba incæte guñente wædāmai ĩmīni ĩnīnque nāwangā nō tömënā nānōmomīni babaīmīnīpa.

⁷Onguñæmīni guiquënē ēñēedāni. Mīnitö gænāni tönō quëwëninque tömënāni beyæ ante cōwē pönëninque waa cæedāni. Botö gængä onquiyængā ĩnongā inte aquīngā ingā incæte mōna guëa cæcaya ĩmōnāpa, ante ēñente wædinque mīnitö gænāni ĩnānite edæ cōwē waa aedāni. Ayæ, Mōna gāncaya Wængongui ingante apāneyōmōna tömengä do ēñencæcāīmpā, ante cædinque ĩmai pōnente cæedāni. Wængongui ĩñömō, Mīna quëwenguīmāmo, ante waadete pōnō cæcā beyænque mōna guëa ænguīncaya ĩmōnāpa, ante edæ ēñente cæedāni.

**Mīni waa cædö beyænque
caate wæquīmīni, ante**

⁸Tömāmīni guiquënē ēñēedāni. Mīnitö adoyōmō pönëninque Ao ante cæedāni.

Nē Ca ca wacā tönö edæ adoyömö Ca ca pönente wæedāni. Mönö pönencabo imompa, ante cædinque godongämæ waadete pönëedāni. Wacā caate wacā adinque mīnitō tōmengā tönö guëa wæte bai pönëedāni. Nāmā ængö cædāmaī imīni inte mīnitō wæætē edæ, Önömonque bai inömö imompa, ante piyænē cæte quëwëedāni. ⁹Wënæ wënæ cædāni wæmīni incæte, Botō wæætē wënæ wënæ cæbo wacā tocæi, ante cædāmaī iedāni. Wiwa ānāni wæmīni inte, Botō wæætē wiwa āmo wacā tocæi, ante cædāmaī iedāni. Wæætē edæ, Tömënāni waa quëwencædānimpa, ante cædinque mīnitō tōmënāni inānite waa apænedinque godō waa cæedāni. Mänōmaī cæcæmīnimpa, ante Wængongui mīnitō imīnite waa cædinque pönö aa pegacāimpa cæmīni. ¹⁰Edæ iīmaī ante Wængongui beyæ ante yewæmongatimpa,

“Wacā tōmengā nānō
quëwenguiimāmo ante nanguī
æinente wædinque,

Tæönæ waa quëwente tocæi, ante nē
angā iñömö
tōmengā iñömö wënæ wënæ
tededāmaī inte babæ wapiticæ
ānāmaī inte tæönæ quëwente
tocæcāimpa.

¹¹Tæönæ quëwencæte ante cædinque
tōmengā wënæ wënæ nānō
cæinō ante emö cædinque dadi
ëmæninque waa edæ cæquëngā
ingampa.

Ayæ tōmengā piyænē cædinque,
Mönö tōmāmō godongämæ gänē
pönente quëwengæimpa, ante
nanguī cæquëngā ingampa.

¹²Mönö Awënë awinca emongā inte
nē nō cædāni gämænō adinque
tömënāni inānite cōwē aacampa.
Ayæ, Botō imote æbānō ante
apænedāni, ante tōmengā
ëamonca ongonte cōwē
ëñengampa.

Wënæ wënæ cædāni inānite
guiquënë tōmengā pīininque
awincaque acampa.”

ante yewæmongatimpa cæmīni.

¹³Mīnitō waa cæcæte ante edæ nanguī
cæinēmīni bamīni adinque æcānō
wæætē mīnitō imīnite wënæ wënæ
cæquingā. ¹⁴Incæte mīnitō nō pōnī
mīni cædō beyænque caate wæmīni
īninque edæ mīni waa quëwente
toquinque imaimpa. İninque iīmaī
ante nāni yewæmongainō bai cæedāni.
Tömënāni nāni guiñente wæpāmo
beyæ ante mīnitō iñömö edæ guiñente
wædāmaī iedāni. Edæ guiñēnate
wædāmaī iedāni.

¹⁵Wæætē, Tæiyæ Waëmō Awënë
inongā ingampa, ante wede pönëninque
edæ Codito ingante mīmōno
entawëedāni. Ayæ, Watapæ bacæimpa,
ante mīnitō quīnante pönēmīni, ante
ëñencæte ante wadāni āñōnānite mīnitō
wæætē a ongōnāmaī inte iīnonque ante
edæ do apænēmīni incæmīnimpa. Codito
mōnitō Awënë pönö cæcā beyænque
mōnitō, Watapæ bacæimpa, ante wede
pönëmōnīpa, ante mænīnonque ante
do apænēmīni edæ ëñencædānimpa.
¹⁶Iñāni iñömö ëñencæte ante ānānīpa,
ante pönëninque mīnitō, Botō wentamō
entawënāmaī incæboimpa, ante nāmā
apænte cædinque guiñente wædinque
tömënāni inānite ædæmō apænēmīni
ëñencædānimpa. Mänōmaī cæyōmīni
wadāni guiquënë mīnitō Codito nempo
quëwëninque mīni waa cædōnō ante
pīininque babæ ante todānitawo.
İninque mīnitō wentamō entawënāmaī
inte ædæmō apænēmīni adinque
tömënāni wæætē, Mōnitō babæ ante
tedetamōnīpa, ante ëñëninque guiñënete
wæcædānimpa.

¹⁷Mīnitō wënæ wënæ cæmīni
beyæ caate wæmīni ininque ononque
imaimpa. Wæætē, Wængongui, Caate
wæcæmīnimpa, angā ininque mīnitō
waa pōnī mīni cædō beyænque caate
wæmīni ininque edæ godōmenque
waa imaimpa. ¹⁸Mīnitō nō cædāmaī
iñōmīnite Codito iñömö mönō nē nō
cædongā inte mīnitō imīnite Wængongui
weca ænte poncæte ante cædinque
wënæ wënæ mīni cædō beyænque

adopoque caate wængacäimpa. Tömengä baö ëñayongante tömengä ingante wænönäni wængä ate Wængongui Önöwoca angä ate ñäni ömæmonte edæ müngä quëwengampa. ¹⁹Ayæ adobaï Wængongui Önöwoca tömengä ingante ænte mäocä godingue tömengä në wænte gogainäni önöwocacoo tee mönete ongoncoo weca gote apænecä ëñengadäniimpa. ²⁰Mäninäni në tee mönete ongönäni inänite Nöwee wodi Docä näni änogä doyedë ancaa apænecä incæte tömënäni ëñänämaï inte cægadäniimpa. Mäninäni në ëñänämaï cægainäni iñönäni Codito ñöwo tömënäni weca gote apænecäimpa. Wængongui iñömö, Wipo ñænængade pöni impo incæ oncö baï mänoncæbiimpa, ante Nöwee ingante do angaingä inte, ñinque mänoncæcäimpa, ante ee wänö congacäimpa. Incæte mäninäni ëñänämaï cæyönäni ocho ganca inäni mänimpodäni que apæno yædopäa wogaa gote quëwengadäniimpa.

²¹Mänimæno edæ wogaa godingue tömënäni näni quëwengai baï minitö adobaï æpænë guiddingue quëwëminipa. Incæte wii baonque mënongate beyæ quëwëminipa. Wæætë minitö, Wængongui ayongä botö mümö ñä mënongate entawëmo inte quëwëmpa, ante nämä apænte pönëningue æpænë guimimipa. Edæ guiddingue müni ængæ gantidö baï Itota Codito ñäni ömæmonte quëwengä beyænque minitö adobaï ñäni ömæmonte quëwëminipa. ²²Tömengä iñömö do öönädë æite Awënë badingue Wængongui tömëmængä inö edæ tæ contayongante anquedoidi incæ në änäni incæ në tæi piñænte cädäni incæ tömënäni tömänäni edæ tömengä nänö äno ante ëñente cädäni cæminii.

**Wængongui nänö pönö
cæganca mönö cæcäimpa**

4 ¹Në caate wædingä iñömö, Botö idæwaa wænæ wænæ cæte awædö, ante tömengä wiwa nänö cædinö ante do wido cæcampa. ñinque minitö,

Codito incæ baonga quëwëningue caate wægacäimpa, ante pönëningue, Botö baonga caate wædingue ëñente badingue botö wænæ wænæ cædinö ante wido cæcæboimpa, ante piyænë cæte tæi ongödäni. ²Edæ në caate wædingä iñömö, Mönö waocabo baonque ante mönö cæinëwënö ante botö iñömö cædämaï incæboimpa, ante pönëningue edæ ñimpo cædingue inguipoga tömengä nänö quëwenguinganca Wængongui nänö änonongue ante ëñente quëwengampa. ³Ëñänämaï inäni cæinente wæwente näni änonö ante ëñente minitö wëenëñedë adobaï quingämë baï cæte quëwengaminipa. Edæ baonque ante müni toinente wæwënonque ante do cædingue minitö tömënäni näni cæi baï cædingue edæ ti nämæ bete quidi quidi dowæningue beowæo inte cæowæo inte Yæ yæ angaminipa. Ayæ minitö tömëmini badöninca incæ adingue, Mönitö wængongui ingampa, ante ædæ wænte tedewengaminipa. Nöwo iñömö minitö mänömaï cæte idæwaa cæminii awædö.

⁴Tömënäni iñömö baonque ante näni godö toinëwënö ante cæcæte ante pogodo gote baï cædingue minitö iminite, Ponguënë quëwënanii, ante ancaa änanipa. Minitö gomö adingue tömënäni tönö godongämæ godämaï imini adingue tömënäni wæætë, Quimæ awincaque gomö awëminii, ante edæ piinte änewënanipa. ⁵Incæte mönö waocabö mümö quëwëmö incæ do wænte gogainäni incæ tömämö imonte në oo apænte anguingä iñömö edæ Wængongui inongä ingampa. ñinque tömengä, Æbänö cægaminii, ante angä ëñente wædingue mänömaï cægainäni wæætë aamö cædämaï inte tömënäni näni cægainö ante edæ do apænequinäni inänipa. ⁶Mänömaï beyæ do wængainäni inänite mönö Codito ingantedö ante watapæ apænecatimpa. Tömënäni baö ëñate quëwëñönäni waodäni apænte äningue pänäni incæte Wængongui wæætë, Tömënäni önöwoca ëwocadingue quëwëncädäniimpa, ante tömengä waa pöni nänö cægainö

beyænque nāni quēwenguinō ante godō apæneca ēñengadānimpa.

⁷Nōwo iñōmō tōmancoo edæ oo iinque baquinō anguēnē. Mānōmaī impa, ante ēñente wāmīni inte mīnitō, Mōnō tōingā pōnente Wængonguī ingante apænecaēimpa, ante cædinque nāmā wææ aadinque ocaī encate pōnēdāni. ⁸Wēnæ wēnæ cæmō incæte waadete pōnēmō iinque mōnō waadete cædō beyænque wadāni piyænē cæte pīnāmaī inānīpa. Mānōmaī impa, ante pōnēninque mīnitō nē wede pōnēmīni inōmīni inte cōwē waadete pōnente cædāni. ⁹Edæ wadāni inānite, Pōedāni, āninque wacā ingā wacā ingā pædæ godōninque edæ, Tōmēmō qui impa, ante wædāmaī iedāni.

¹⁰Wængonguī, Botō pōnō waadete cæbo ate mīnitō ado botō waadete cædōnō ante ænte ēwocadinque godō waadete cæedāni, ante adocanque ingante wadō wacā ingante wadō pōnō waadete cæcā ænte ēwocamīnīpa. Īninque mīnitō tōmāmīni mīni ænte ēwocaganca cædinque mīni pōncabo beyæ godongāmæ waa cæquēnēmīni imīnīpa. ¹¹Wængonguī pōnō cæcā æninque æcānō nānō apænequinganca ēwocacā tōmengā Wængonguī nānō apænedonque ante apænequēnengā ingampa. Æcānō wadāni beyæ ante nānō nē cæquinganca ēwocacā tōmengā Wængonguī nānō tæi pīñænonque entawēninque waa cæquēnengā ingampa. Mānōmaī cædinque mīnitō waa cæmīni adinque mōnō tōmāmō Itota Codito emōwo apænedinque Wængonguī ingante, Bitō waēmō pōnī inōmī inte waa cæbīpa, ante apænecaēimpa. Tōmengā iñōmō nē tæi emōnongā inte ñāō emōninque nē nanguī cædongā ingampa, ante mōnō pedænguipoga quēwēmō incæ iincayæ ponte miinguipoga quēwēmō incæ cōwē watapæ pōnī apænecaēimpa. Mānōmaī baquinō anguēnē, ante botō, Amēē, āmopa.

**Codito nempo quēwēninque
caate wæcæmīnīpa, ante**

¹²Botō nē waademīni ēñēdāni. Mīnitō ñōwo incæ gonga gonte caate

baī wāmīni incæte, Quiēmē beyæ mānōmaī caate wæboī, ante guīñente wædāmaī iedāni. Edæ wīi ononque caate wāmīnīpa. ¹³Wæætē, Codito nānō caate wægānonque godongāmæ ñōwo caate wāmōnīpa, ante pōnēninque watapæ toedāni. Mānōmaī caate wædinque tomīni ĩninque Codito ñāō apāite baī nānō pōñedē godōmenque gomonga watapæ toquīmīni ĩmaīmīnīpa. ¹⁴Mīnitō ĩmīnite wadāni piinte āninque, Codito emōwo ononquedō waa adinque wæcantedō abi, ante badete todāni ĩninque Wængonguī wæætē, Watapæ quēwencæmīnīpa, ante pōnongā æninque mīnitō tōmengā Ōnōwoca nē ñāō emōnongā ingante ēwocamīni beyæ toquēnēmīni imīnīpa. ¹⁵Wacā ingante nē godō wænongā ingante do pānāni wæcampa. Wacā qui nē awēmō ængā ingante nē wēnæ wēnæ cæcā ingante adobaī pānāni wæcampa. Adocanque nē cæquēnengā inte ānāmaī iñongante wacā iñontobæ godō ononque cæcā ate nē ononque cæcā ingante pānāni wæcampa. Mīnitō wæætē nāmā wææ aadinque tōmēnāni nāni cædō baī cædāmaī imīni ĩninque caate wāmīni incæte ædō cæte mīni wīwa cædō beyæ pānāni caate wæquēnēmīni. Edæ dæ anguēnē.

¹⁶Wæætē wadāni mīnitō ĩmīnite, Wææ, Codito emīñæmi ĩmpææ, ante piinte cædāni caate wāmīni incæte mīnitō guingo imonte wædāmaī iedāni. Wæætē edæ Wængonguī ingante apænedinque edæ, Bitō ñāō emōmī inte pōnō pemonte baī cæbi æninque mōnitō Codito emōwo emonte baī adobaī emōmōnīpa, ante waa apæneedāni.

¹⁷Edæ iīmaī impa. Wængonguī tōnō mōnō godongāmæ owocabo iñōmonte tōmengā oo apænte ancæcāimpa. Īninque mōnō imonte tāno apænte angā ĩninque tōmengā wadāni inānite guiquēnē æbānō cæquingāā. Tōmengā ingantedō ante watapæ apænedāni ate nē ēñente cædāmaī ināni inānite apænte āninque Wængonguī quingāmē baī nanguī pangā wæquīnāni. ¹⁸Ayæ

Wængonguī beyæ nāni yewæmongainō
 bai impa. Nē nō cæcā wodo
 wænguēnengā iñongante Wængonguī
 tingæ ængā beyænque quēwēñongā
 Wængonguī ingante ēñēnāmaī
 ingā guiquēnē tōmengā ædō cæte
 quēwenguingāā. Nē wēnæ wēnæ cæcā
 adobaī edæ ædō cæte quēwenguingāā.
¹⁹Minitō iñōmō Wængonguī nānō
 āninō beyænque caate wæminitawo.
 Iñinque mănōmaī beyænque mīnitō,
 Mōnō imonte nē badongaingā cōwē
 pōnēninque ædæmō aaquingā ingampa,
 ante pōnēninque nāmā mīnitō ōnōwoca
 tōmengā nempo godōninque piyænē
 cæte godōmenque waa cæquēnēmīni
 imīnipa.

**Mīni pōnencabo æbānō cæte
 quēwengæīmpa, ante**

5 ¹Mīni pōnencabo iñōmīnite
 pancamīniya nē aamīni Picæmīni
 mōnō āmīni imīnipa. Botō iñōmō adobaī
 nē aabo Picæmo iñōmo inte, Mōnō nē
 Picæncabo, ante mīnitō imīnite ædæmō
 apænedinque āmopa. Codito caate
 wæcā nē agaimo inte botō edæ waadete
 āmopa. Ayæ Codito ñāō bai nānō ēmōnō
 edonque pōnī nānō odōmonguīnō ante
 botō tōmengā tōnō ñāō bai entawēmo
 iñōmo inte edæ, Eñencæmīnimpa, ante
 nanguī āmopa. ²Codito ingante nē
 pōnēnāni iñōmō mīnitō nempo cænīnāni
 bai ongōñōnānite mīnitō tōmēnāni
 inānite nē aamīni imīnipa. Wængonguī,
 Nē pōnēnāni inānite aacæmīnimpa, angā
 ēñēninque mīnitō wæætē Baa āmōni
 iñinque Wængonguī pangā wæcæ wæ,
 ante guīñente wæminitawo. Iñæmpa
 wīi guīñente beyænque aacæmīnimpa.
 Wæætē Wængonguī, Mīnitō do Ao
 ante aacæmīnimpa, ante tōmengā
 nānō ānōnonque ante edæ ēñente
 cæte edæ tōmēnāni inānite ædæmō
 aedāni. Ayæ edæ godonte æinta ante
 æīnente wæminitawo. Iñæmpa wīi
 æncæte ante wædinque mīnitō edæ, Nē
 pōnēnāni beyænque nanguī cæīnente
 wædinque cæcæboīmpa, ante piyænē
 cæte aedāni. ³Wadāni nē cænīnāni

bai mīnitō nempo ongōñōnānite mīnitō
 wæætē imæca awēnēīdi nāni piinte
 āmaī wīi adobaī piinte æedāni. Wæætē
 edæ, Mōnō waa cæte quēwēmō adinque
 tōmēnāni mōnō bai adobaī waa cæte
 quēwencædānimpa, ante cædinque edæ
 waa cæedāni.

⁴Mānōmaī cæmīni iñinque mōnō nē
 Aadongā Ñænængā pōnī inongā iñōmō
 iñcayæ ponte a ongōninque poganta
 ñāō ēmonta cōwē wodāmaī inta pædæ
 pōnonte bai cædinque mīnitō imīnite,
 Mīnitō nē aamīni inte botō ñāō ēmonte
 ongōñōmō ponte quēwencæmīnimpa,
 ancæcāīmpa.

⁵Tæcæ æmæwo pæimīni guiquēnē
 ēñēedāni. Godōmenque picænāni nāni
 āninō ēñēninque edæ Ao ante cæedāni.
 Ayæ gānē entawente pōnēninque,
 Ōnōmōnique bai mōnitō imōnipa, ante
 pōnēninque wacā nānō āninō ante
 ēñēninque Ao ante cæedāni. Edæ iīmaī
 ante yewæmonte ongompa.

“Nāmanque ante, Mōnitō gomonga
 waa cæmōni imōnipa, ante nē
 pōnēnāni inānite edæ Wængonguī
 Baa angampa. Wæætē edæ,
 Mōnitō ōnōmōnique bai imōnipa,
 ante nē ānāni inānite tōmengā
 pōnō waadete cæcampa.”

⁶Ante yewæmongatimpa cæmīnīi.
 Iñcayæ ate eyepæ pōnī bayonte
 Wængonguī incæ mōnitō imōnite ængō
 cæcā ongoncæmōnimpa, ante cædinque
 mīnitō ñōwo iñōmō nē tæī piñængā
 ōnōnempo ongōninque nāmā ængō
 cædāmaī iedāni. ⁷Codito mōnō imonte
 waadete pōnente cæcampa, ante ēñente
 wædinque mīnitō guīñente mīni wædō
 ante tōmengāā wo cæmīni mongængā
 ate mīnitō guīñēnāmaī iñinque wæætē
 guēmancæmīnimpa.

⁸Nāmā incæ edæ wææ aedāni.
 Wēnæīdi awēnē iñōmō edæ mēñebo
 nē piinte angā bai inongā inte, Æcānō
 ingante eate cænguīmoo, ante nē
 piinte cædongā inte awēmō diqui diqui
 mingampa cæmīnīi. Ee aedāni. ⁹Mīnitō
 caate wæmīni incæte, Mōnō tōñīñadāni
 inguiipoga tōmāmæ quēwēninque adobaī

edæ caate wædānīpa, ante do ēñēmīni
 inte Codito ingante wede pōnēninque
 adiyæ næ gongæninque wēnæ awēnē
 ingante cōwē Baa æedāni. ¹⁰Mānōmaī
 cædinque wantæ iñō caate wæmīni ate
 Wængonguī nē waadete pōnō cædongā
 inte mīnitō imīnite pōnō cæcā ate edæ
 gancæ bacæmīnimpa. Ayæ godōmenque
 pōnō cædinque tōmengā mīnitō imīnite
 pōnō tæi gōnongā ate mīnitō tæi
 piñænte entawēninque wæntædāmaī
 inte edæ cōwē tæi ongoncæmīnimpa.
 Tōmengā adocā iñōmō ñāō bai cōwē
 emōnongā inte mīnitō imīnite aa
 pedinque, Mīnitō Codito nempo nē
 quēwēnōmīni inte botō ñāō emonte
 ongōñōmō pō guite quēwēedāni,
 angacāimpa. ¹¹Tōmengā iñōmō cōwē tæi
 emōninque nē nanguī cædongā ingampa,
 ante mōnō pedænguipoga quēwēmō
 incæ iincayæ ponte miinguipoga
 quēwēmō incæ cōwē watapæ pōni
 apænecæimpa. Mānōmaī baquīnō
 anguēnē, ante botō, Amēē, āmopa.

Waa quēwencæmīnimpa, ante

¹²Botō tōniñacā bai inongā inte
 Tidibānō iñōmō cōwē pōnēninque
 ædæmō cæcā ingampa, ante adinque

botō tōmengā tōnō godongāmæ
 cædinque, Mīnitō acæmīnimpa, ante
 cadota ante ocanta yewæmōmopa.
 Ii cadota adinque mīnitō gancæ
 pōnēninque nanguī cæcæmīnimpa,
 ante cædinque botō Pegodobo iñōmō,
 Wængonguī nāwangā mānōmaī pōnō
 waadete cæcampa, ante yewæmōmopa
 cæmīni. Tōmengā nānō waadete
 cædonque ante entawēninque edæ
 mīnitō adiyæ tæi gongænte ongōedāni,
 āmopa.

¹³Mīnitō imīnite apænte æninque
 Codito iñōmō Babidōnia iñōmō
 tōmengā ingante nāni godongāmæ
 pōnencabo inānite adobai apænte
 ængacāimpa. Tōmēnāni iñōmō mīnitō
 imīnite, Waa quēwencæmīnimpa,
 ante apænedānīpa. Botō wengā bai
 inongā inte Māadoco adobai, Waa
 quēwencæmīnimpa, angampa. ¹⁴Mīni
 pōnencabo adobai godongāmæ waadete
 pōnēninque, Wængonguī bitō imite waa
 cæcæcāimpa, ante wacā ingā wacā ingā
 apæneedāni.

Codito nempo quēwēmīni
 inte tōmāmīni gānē pōnente
 quēwencæmīnimpa, ante botō Pegodobo
 imo yewæmōmopa.